

Xajon ra tsikínda jè Pablo ra isìkasén-la xita naxindá-la Cristo ra títsajna ya Colosas

Kó'sín nga síhixo'ta jè Pablo jñà xita naxindá Colosas

1 ¹⁻² Jiòn, xita-la Nainá ra títsajna ya naxindá Colosas ra ko'sín kixi mangí'ta-la Cristo Jesús, jè 'ndse Timoteo ko 'an Pablo, 'koáá 'sín inchinìhixo'tá-lajin, 'an ra ko'sín tsikíxáya-na Jesucristo koni 'sín nga jè Nainá kjomejèn-la. Nainá ra Na'in-ná ma, katatsjá-no kjonda ko kjo'nchán ya ajin inìma-no.

Kó'sín jè Pablo tsjá-la kjonda Nainá

³ 'Kia nga nakjoá'ta-lajin Nainá ra Na'in-la Jesucristo ra tíjna ítjòn-ná, 'koáá 'sín 'mì ki'ta-lajin ra a'ta tsajìòn nga tse kjonda kata'se-la ra jè. ⁴ Ta ngatji-la ijyee ko'sín nda kina'yá-jin nga ndaá makjiín-no a'ta 'tse Cristo Jesús, ko kó'sín nga 'nó tsjacha jiòn nga'tsi jñà ra xita-la Nainá. ⁵ Ko kíí ko'sín 'nià-najìòn nga jè inchihiñá-la jè kjonda ra tjábé-no ra jè Nainá tíjnatjò-la ján ngajmi; koni 'sín kjòchiya-no 'kia nga kina'yá jè 'én xitse ra nda tsò ra ngi kjohixi. ⁶ Jè 'én nda rakìi ra ko'sín ijchòkàjin-no, 'nó tína'yá-la nga tíjngo isà'nde ko 'nó kjin xita inchimakjiín-la ko inchi-fahatjìya-la kjòbítjen-la koni 'sín kjomà'tin jiòn 'kia nga tí'sa ina'yá jè kjonda ra tíjn-la Nainá ko nga kjokjiín-no nga ngi kjohixi-ní. ⁷ 'Koaá 'sín tsakón-ya-no jè Epafra jè xita ra 'nó tsjacha-jin ra taña níxákjo-jin a'ta 'tse Nainá, nga chi'nda-la Cristo ma nga kixi tísíhitjasòn-la Nainá ra a'ta tsajìòn. ⁸ Ijyee tsi'kénajmí-najin nga 'nó tíjn-no kjòtsjacha

ra a'ta 'tse xita, koni 'sín nga jè Inìma Tsje-la Nainá síkjinchrabájin inìma-no.

⁹'Koaá ma-ni, skanda 'kia nga ina'yá-jin mì kì chaàjin-najin nga inchinakjoá'ta-lajin Nainá ra a'ta tsajiòn; 'koaá 'sín níjé'ta-lajin nga ngi nda katasíchiya-no koni 'sín mejèn-la ra jè; tì'koaá katatsjá-no kjobítsjen kò kjoachjine mé-ni nga nda katafiya-no ra kjoa 'tse Nainá. ¹⁰Kò tì'koaá nda sijchá ijo-no koni 'sín tjínè-la nga 'siin jñà ra xita-la Nainá, nga nìchjin nchijón kò'sín 'siaan koni 'sín mejèn-la ra jè, kò nga isa nda sihitjasòn ta mé kjoa ra nda tjín kò nga ki'ta nìchjin isa nda jchaxkon ra jè. ¹¹Tì'koaá 'koaá 'sín inchiníjé'ta-lajin Nainá nga katatsjá-no nga'ñó-la ra 'ñó jeya tíjna mé-ni 'ñó kìncha-no kò 'koaá 'sín ma-ni nga kichíkjoako-no kò 'se-no kjoajetakòn kò kjoatsja, ¹²nga tì'koaá kò'sín 'kín-la jìòn nga tse kjonda kata'se-la Na'ín-ná nga kitsjà-no kjonda-la nga tì'koaá tjábé-no kjetjò ra tsjá-la xita-la ya ñánda isen chon. ¹³Jé Nainá tsachrjekàjin-ná ya a'ta 'tse nga'ñó-la xita-níí ñánda nga jñò chon, kò yaá isíkítsajna-ná ya ñánda tíbatéxoma I'ndí-la ra 'ñó tsjake, ¹⁴jè ra kò jní-la tsikíchjítjì-ná nga kisíkítsajnandíí-ná kò tì'koaá isihijcha'ta-ná jñà jé-ná.

**Kó'sín nga jè Cristo tíjna ítjòn-la nga'tsi
ra tsijen-ni kò ra mì kì tsijen-ni**

¹⁵Jè Cristo, jé-ní ra ngi bakón tsijen-ná yá kjòn-ni jè Nainá jè ra mì kì tsijen-ni. Kò jé Cristo tíjna ítjòn-la nga'tsi ta mé ra isinda isà'nde. ¹⁶Koó Cristo nga tsikínda jè Nainá nga'tsi ra tjín ya ján ngajmi kò nga'tsi ra tjín i a'ta nangi, jñà ra tsijen-ni kò jñà ra mì kì tsijen-ni, nga'tsi nga'ñó ra tjín ajin isén, jñà ra tjítsahijyo ítjòn, kò jñà ra inçibatéxoma, jñà ra tjín-la xá, kò jñà nga'ñó ra mì kì tsijen-ná; sabà koó Cristo kisinda ijye mé-ni nga jè kochjeén-la. ¹⁷Ta'koaá tíjna Cristo 'kia nga tìkje sinda nga'tsi tsajmì ra tjín, kò jé tsjá nga'ñó-la nga'tsi tsajmì nga takó ya títsahijyo ki'ta ya i'nde-la. ¹⁸Jé Cristo tíjna skò naxindá-la ra tijè-ni ijo-la, kò a'ta 'tseé kjo'tsia-ni, kò jé kjón kjo'tsia-ni nga jaáya ítjòn-la, mé-ni nga jè kíjna ítjòn-ni a'ta 'tse nga'tsi ra tjín. ¹⁹Nainá, 'koaá 'sín isasèn-la nga jngo kjá ya tsikijnajin ya ijo-la Cristo, ²⁰kò a'ta 'tseé Cristo ma tsajoóndako-ni Nainá nga'tsi ra tjín nga tjíjtsa isà'nde, ra tjín ján ngajmi kò ra tjín i a'ta nangi; kò a'ta 'tseé

jní-là ra ixaájten ya a'ta krò nga 'nchán isíkítsajna-ni xítà ko Nainá.

Kó'ki tse kjonda tjin-ni nga tsachrjekàjin-ná kjohi'in Nainá

²¹ Jìòn, nga 'sa íjtòn, kjiín titsajna-la Nainá, ko kondràá tsikítsajna-la koni 'sín nga iníkítsjen ta ngatjì-là nga 'choó tjin kjoa ra ki'nià. ²² Tanga 'ndi-ni ijyeé nda kichiba-no ko Nainá ta ngatjì-là kjobiya ra kisikjiín Cristo 'kia nga tsikijna ya a'ta nangi, ko kií ko'sín ki'sin-ni mé-ni nga tsje kítsahijyo-najìòn ko nga nímé jé 'se-no ko nímé ra ma kochrjengi-no ya ngixkon Nainá. ²³ Kíí machjeén-ni nga kixi títsajna koni 'sín nga makjiín-no ko kì mincha'taxìn-la kjoa ra inchichiñá-la a'ta 'tse 'én xítse ra nda tsò a'ta 'tse Cristo ra ijye inalyá; jè 'én nda rakìi, jndíi ra ján tí'senajmíya-là xítà nga tíjngo isà'nde, ko 'an ra 'mì-na Pablo 'aán kjongatsja nga 'kenájmiya.

Xá-là Pablo

²⁴ 'Ndi-ni tsjaá 'bé-na jè kjohi'in ra tísikjiáan ra ta kjoa tsajìòn, nga 'koaá 'sín tísíjngoko ijo-na jè kjohi'in ra chija'ta-na koni 'sín nga kitsjà-na Cristo nga sìkjiín kjohi'in ijo-na ra ta kjonda 'tse naxindá-là ra tijè-ni ijo-là Cristo. ²⁵ 'Aán tísichjeén-na Nainá nga ya tísixákoo naxindá-là jè xá ra jè kisingatsja-na ra kjonda tsajìòn nga ngi nda 'kenájmiya 'én nda-là, ²⁶ jè 'én ra tíjna'ma-là Nainá skanda nga tí'sa-ni kjoatseé nga ki'se xítà; tanga nichjin 'ndi 'ndi ijyeé tsakón-là jñà xítà-là. ²⁷ Jè Nainá, 'koaá 'sín kjomejèn-là nga tsakón-là jñà xítà-là kó'sín 'nó jeya tjin kjàn-ni jè kjoa'ma ra tíjnda-là ra a'ta 'tse ra mì tsa xítà judío. Ko jè kjoa'ma rakìi, jé-ní nga Cristo, yaá tíjnajin masen-no ko 'koaá 'sín ma-ni nga inchichiñá-la nga 'se-te-no jè kjoajeya-là.

²⁸ 'Koaá 'sín nakjoáya-lajin nga'tsì xítà a'ta 'tse Cristo, ko 'nó inchinakjoá-lajin nga inchi'bi-lajin nga'tsì kjobítsjen mé-ni nga nímé ra jchija'ta-là nga'tsì xítà ra Cristo títsajna ko jè nichjin 'kia nga kijchò ya ngixkon Nainá. ²⁹ Kíí ko'sín tísixá-na nga 'nó tíbiné-là ijo-na nga tísichjeén jè nga'nó ra títsjá-na Cristo.

2 ¹ Mején-na nga nda katasijin-najìòn nga 'nó tíkjaán-tjia ra a'ta tsajìòn ko ra a'ta 'tse jñà xítà ra títsajna ya naxindá Laodicea ko a'ta 'tse nga'tsì xítà ra kjè bexkon-ná. ² Kíí ko'sín tíkjaán-tji-na mé-ni nga kata'se-là nga'nó inima-là, ko mé-ni

nga jñà kjòtsjacha ra tjín-la nga jngó jngó nda katasíkítsajtín mé-ni nga nda katamakixijin-ni ya kjòbítsjen-la nga ngi nda kjón katamachiya-la jè kjoa'ma-la Nainá ra Na'ín-ná, kjoa'ma ra jé kjón-nì Cristo. ³Nga ta jé Cristo ra tjín-la nga'tsi kjochjine kò kjoa ra síchiya-ná ra batoó 'ñó chjí-la. ⁴Kíi ko'sín tíxin-no mé-ni nga mì yá ra skoóndacha-no nga sìichjeén 'én ra nditon kokjiín-no ra mì tsa 'én kixi. ⁵Ni'sín mì tsa ya tíjnako tsijen-no, tanga tíbítsjen ki'ta-na a'ta tsajìon kò matsjaá-na nga be nga kixi titsajtiòn kò kixi titsajna nga kji'ta takòn jè Cristo.

⁶Koni 'sín nga kjokjiín-no a'ta 'tse Jesucristo ra tíjna ítjòn-no, 'koa tí'sín ya tíma'ta-la koni 'sín nga bakèn-la xita ra ya títsajnajtín-kò Cristo. ⁷Ngi nda kjón kixi katamakjiín-no a'ta 'tse, koni jngo yá ra 'ñó nanga fi kjama-la kò koni jngo ni'ya ra 'ñó tjín chrjò tjà'tsin nga 'nga tímihijin. Kò'sín isa 'ñó katamakjiín-isa-no koni 'sín nga tsakon-ya-no, kò ko'tìn ki'ta-la nga tse kjonda kata'se-la Nainá.

Kó'sín nga ijyee tí'ta chibéé ra a'ta 'tse Cristo

⁸Nda tikindaa ijo-no mé-ni nga mì jñà skoóndacha-no jñà ra ta kjòbítsjen ra nimé chjí-la síchjeén nga chja 'én ndiso. Nga jñà kjòbítsjen ki, ta yaá nchrabá-ni a'ta 'tse kjoa ra ta xita bínda koni 'sín tjín kjotéxoma-la xita ra tjín i isà'nde, ra mì tsa ko'sín tjín koni 'sín tjín kjotéxoma 'tse Cristo.

⁹Yaá 'ya ijo-la Cristo kóho'ki tíjngo kjòn-ni ra jè saba Nainá. ¹⁰Kò yaá majngo'táko jìon nga Cristo titsajnakoo. Nga jé Cristo tíjna ítjòn-la nga'tsi nga'ñó kò nga'tsi ra batéxoma ya ajin isén. ¹¹Kò a'ta 'tse-ní nga isi'ta chiba jìon koni 'sín tjín kjoa 'tse circuncisión, tanga jngo chiba ra mì tsa tsja xita isi'ta-ni, jè-ní ra Cristo tsikí'ta chiba-no 'kia nga jahíxìn nga'tsi jé ra tjín-la ijo jé-no. ¹²'Kia nga isatínda jìon, 'koaá jngoya-la koni tsa yaá isihinde'ta-la Cristo, kò 'kia nga jaáya-ila Cristo yaá jaáya-te-no ra jìon ta ngatjì-la nga kjokjiín-no a'ta 'tse nga'ñó-la Nainá ra isikjaáya-la Cristo a'ta 'tse kjoabiya. ¹³Jìon nga 'sa ítjòn, mi'ken-nájìon a'ta 'tse Nainá ta ngatjì-la kjoa 'tse jé ra tjín-no, kò ta ngatjì-la nga kjè kì tsa bí'ta chiba-no Cristo nga kjè kì tsa faháxìn jé ra tjín-la ijo jé-no. Tanga 'ndi-ni, Nainá, ijyee isíkítsajnakon-no kò Cristo, nga nga'tsi-ná nga ijye isihijcha'ta-ná nga'tsi jé ra tjín-ná. ¹⁴Koaá jngoya-ila koni tsa jè Nainá ijye isikjeheya-ni xajon ra itjahítjen ra kondra

tsajién, jè ra batéchjá-ná tsiki. Jngo kjá ya jahíxìn 'kia nga 'ken'ta krò Cristo. ¹⁵Nainá jahíxìn ijyee-la nga'ño ra tjín-la jñà ra batéxoma ya ajin isén. Yaá kisikijne-la 'kia nga jè Cristo 'ken'ta krò. Kò yaá tsinchá masen ya ngixkòn nga'tsi xita, mé-ni nga tsakón-la nga jè isikijne.

Kó'sín nga mì kì ma-la kosiko-ná ra ta kjotéxoma-la xita isà'nde

¹⁶Koaá ma-ni, kì ya nisin-la tsa yá ra kó k̄itso-no a'ta 'tse tsajmì ra chine kò mé nandá ra 'siòð; kò tsa mì kì nihitjasòn jiòn 'kia nga bitjo 'sí, kò 'kia nga bitjo xit̄se india-ni sá, kò tsa mì kì 'yaxkón jiòn nichjin níkjáya. ¹⁷Ta nga'tsi kjoa k̄i, 'koaá 'sín jngoya-la koni jñà 'ngièn-la kjoa ra askan 'ji. Tanga ra ngi kjoakixi, jé Cristo. ¹⁸Kì bi'nde yá ra faháxìn-no jè kjotjò ra ijye tsajiòn, koni a'ta 'tse jñà xita ra mejèn-la nga kò'sín 'siaan jiòn koni 'sín 'sín ra jñà, nga bexkón ikjalì kò nda xita bachrjengi ijo-la, ra kò'sín tsò nga yaá sakò-la kjobítsjen 'kia nga batsijen tsijen-la kjojkón ra Nainá bakón; kò ta kjotjó-ní nga kò'sín ndaá bachrjengi ijo-la a'ta 'tse kjoa ra nì mé chjì-la ra ta kjobítsjen 'tse. ¹⁹Xita k̄i mì tsa ya tjíngoko Cristo jè ra tíjna ítjòn nga skò ma. Nga jé Cristo ra ma skò naxindá-la, kò jé síkihijin nga tsjá-la nga'ño, kò síjngoko xákjén koni 'sín nga tjíkjo ninda-la ijo-ná kò koni 'sín tjín naxá-la ra itsabajin, mé-ni nga nda kihijin-ni koni 'sín nga ijye kiskosòn-la Nainá.

Jé síkítsjeén kjoa ra tjín ya ján ngajmi

²⁰Ijyee ya 'ken-koo jiòn Cristo, kò mì tsa t̄i ya itsabá'ño-no jè nga'ño ra batéxoma jè isà'nde rak̄i. ¿Tanga mé-ni takó kò'sín titsahijyo-no koni tsa ya nakjoá-no jè isà'nde rak̄i nga nihitjasòn kjotéxoma ra tsò: ²¹“Kì kotjín ra chaájni, kì jñà tsajmì kiòð chine-jin, kò kì ndsji chjìbé-ni”? ²²Jñà kjotéxoma k̄i, ta 'tseé jñà tsajmì ra ta ya fe 'kia nga ijye machjeén; kò ta xitaá ra bínda kò ra bakón-ya. ²³Jñà kjoa k̄i, 'koaá ma-ná koni tsa nda tjín nga 'koaá 'sín bí'tin-ná nga kìnè-lá ijo-ná nga jchaxkén Nainá, kò nga nda xita 'sieén, kò kó'sín nga kìnè-lá kjohi'in ijo-ná mé-ni nga kòkixiya-ná. Tanga ra ngi 'én kixi kjòn-ni, n̄i ta mé ra basiko-ná kjoa k̄i nga ma kijmié kjoa'cho ra síjé ijo-ná.

3 ¹Jñà tjatsjio kjonda ra tjín ya ján ngajmi ya ñanda nga tíbatéxoma Cristo nga tíjna'ta ya nga kixi-la Nainá ta ngatjì-la nga ijyee ya jaáya-no kò Cristo. ²Kíí tikítsjen ki'ta

jñà kjoanda ra tjin ya jan ngajmi; kì tà chjàn jñà níkítsjen jñà kjoa ra ma i isà'nde. ³Nga ijyeé 'ken jìòn ra a'ta 'tse isà'nde ko 'ndi-ni jè kjobinachon xitse ra tjin-no, yaá tijnatjòko Cristo ya ngixkon Nainá. ⁴Jè Cristo, jè sabá ra kjobinachon-najìòn. 'Kia nga jè ra kotsíjen india-ni, yaá taña kotsíjen-ko jìòn nga ti'koa jeya kitsajna.

Kjoa jchínga ko kjoa xitse

⁵Jngo kjá tijchija nga'tsi kjoa'cho ra 'ya-ni ijo jé-no koni jñà ra kjoachijngi, ko kjoa ra tje tjin, ko jñà kjoa'cho ra síje ijo-no ko ta mé-isa-ni kjoa ra síkjahajin ijo-no koni jè-te nga mejèn-no tse ton 'se-no. Jè kjoa rakli, 'koaá jngoya-ila koni tsa nainá xkósòn 'yaxkón jìòn. ⁶Nga yaá nchrabá-ni nga ko'sín síkjinchrabá kjohi'in Nainá a'ta 'tse xita ra mì kì síhitjasòn-la. ⁷'Koaá ti'sín ki'nià-te jìòn 'kia nga ya tsikitsajion kjoa kii nga 'sa kjotseé. ⁸Tanga 'ndi-ni tijmió nga'tsi jñà kjoa kii: jñà ra kjoajtitakòn, ko jñà ra kjoat'sen ko jñà kjoa ra 'cho tjin, ko jñà kjoa nga nakjoájno-la xita, ko nga'tsi 'én 'cho ra sa 'koa nakjoá. ⁹Kì 'én ndiso chikoo jñà xàngioo, nga ijyeé itjahixìn-no jè kjobinachon jchínga-no ko nga'tsi kjoa ra ki'nià ti'sa kjotseé. ¹⁰Ko ijyeé jngo kjobinachon xitse ichjibé jìòn koni 'sín 'ki jè Nainá ra tsikínda-no. Ko jè kjobinachon xitse ra tjin-no tímaxitseyá-ní skanda 'kia nga nda kjòn jchaxkon Nainá. ¹¹'Ndi-ni mì tsa tijè 'ñó machjeén-ni yá-ni ra xita griego ko yá-ni ra xita judío, yá ra tji'ta chiba ijo-la ko yá ra mì kì tsa tji'ta chiba ra kjoa 'tse circuncisión, yá-ni xita ra xìn nangi, ko yá-ni ra tísíjchá ima ijo-la, ko yá-ni ra chi'nda tijná'ñó ko yá-ni ra tijnandí; ta jé Cristo ra 'ñó chji-la; nga jé ra tijnajin ya inima-la nga'tsi xita ra makjiín-la a'ta 'tse.

¹²Nainá tsjakeé-no, ko 'koaá 'sín jahájin-no nga tsikítsahijyo'taxìn-no nga ngi naxindá tsje-la ki'sìn-no. 'Koaá ma-ni nga chjibé kjoa xitse koni jñà kjohimatakòn ra inima-no katanchrabájin-ni, 'tiaàn kjonda ra nda tjin, kì xita 'nga ikon 'nià, indakjoa 'tiaàn, ko kata'se-no kjoajetakòn. ¹³Katachíkjoa-no nga jngó jngó a'ta 'tse xàngioo; ko tijchaà'ta-la xàngioo tsa 'kia mé kjoa ra síko-no. 'Koaá ti'sín 'tiaàn koni 'sín ki'sín jè Cristo nga isihijcha'ta-no. ¹⁴Tanga jè ra tijná ítjòn a'ta 'tse kjoa kii, jè-ní nga 'ñó tsjacha 'tiaàn jñà xita xàngioo, nga jé kjotsjacha ra nda síkítsajnajtín-ná. ¹⁵Ko jè

kjoa'nchán-la Cristo nda katatéxoma ya ajin inìma-no, nga xá 'koaá 'sín kiichja-no Nainá nga 'nchán kitsahijyo-koò xàngioo nga jngó jngó-no nga jngo ijo koma-no. Ko ko'sín 'ti-la kjonda.

¹⁶Jè 'én-la Cristo 'ñó nda katasijin ki'ta ya ajin inìma-no. Takón-ya-la xàngioo ko tikixiya nga tichjeén kjobítsjen ra tjín-la kjoachjine. Ko ngi koó inìma-no 'ti-la kjonda Nainá nga tijndá-la so koni 'sín nchrabá ya Salmo, ko so ra jeya síkíjna Nainá, ko so ra ya nchrabájin-ni ya inìma-no. ¹⁷Nga'tsì mé kjoa ra 'siaan, tsa mé 'én ra kinákjoaa ko tsa mé ra mejèn-no nga 'siaan, ngi 'koa kjón 'sín 'tiaàn koni 'sín tjínè-la nga 'siin xita ra chja-ni a'ta 'tse Jesucristo ra tjina ítjòn-ná. Ko ngi a'ta 'tse-ní nga ko'tin-la Nainá nga tse kjonda kata'se-la.

Kjoa ra machjeén a'ta 'tse xita-la Cristo

¹⁸Jiòn íchjín ra ijye tjín-no 'xin, nda tiná'yahijon-la 'xin-no nga 'koaá 'sín síjé jè Cristo ra tjina ítjòn-no. ¹⁹Jiòn ra xita 'xin 'mì-no, tsjacha 'tiaàn jñà íchjín-no; kì tà chjàn 'yaton. ²⁰Jiòn ra ixti 'mì-no nda tihitjasòn-la jñà xita jchínga-no, nga jè Nainá ndaá sasén-la jñà kjoa kii. ²¹Jiòn ra na'in 'mì-no, kì taxki si chitikoo jñà ixti-no mé-ni nga mì sijkjahajen-la ikon. ²²Jiòn ra chi'nda 'mì-no nda tihitjasòn ijye-la ta mé xá ra kii'tin-no jñà ra ni-no ma i a'ta nangi; kì tà 'kia nda níxá 'kia nga tíkotsíjen-no tsa ta jè mejèn-no nga nda kítjongio ya ngxkõn; ngi koó inìma-no nga nda tihitjasòn-la, nga 'ya-nó nga jé Na'ín-ná tíkotsíjen-no. ²³'Kia nga mé xá ra 'siaan, kì ko'sín 'nià koni tsa xita inchiníxá-la, ngi koó kjotsja-no nga nda tihitjasòn koni tsa jè Na'ín-ná inchiníxá-la. ²⁴Ijyeé 'ya jiòn nga jè Jesucristo tsjá-no chjí-no 'kia nga siingatsja-no jè kjõtjò ra bako-no, ta ngatji-la nga jè Jesucristo ra tjina ítjòn-no inchiníxá'ta-la. ²⁵Tanga jè xita ra 'cho tjín kjoa ra 'siin, 'koaá 'sín kochjí-la koni 'sín tjín kjoa'cho ra 'siin. Nga jè Nainá mì tsa fahájin xita; ta ngásòn ngáyaá fiko nga'tsiòo.

4 ¹Jiòn ra ni-la xá ma, nda jchatjò jñà xita chi'nda-no koni 'sín tjín ra kjoakixi; nga jiòn, 'ya-nó nga ti'koaá tjina jngo-no ra Ni-no ma ya ján ngajmi.

Kjoa ra isa 'ñó machjeén nga 'sieén

²Titsanda ki'ta 'kia nga kítsa'ba; kì nikjiá bikjòn-la nga nakjoá'ta-la Nainá; ko ko'tin ki'ta-la nga tse kjonda kata'se-la

ra jè. ³'Koaá tì'sín títsa'batjì-nájìn mé-ni nga jè Na'ín-ná katakí'xa'nde-ni nga koma 'kénajmí-jìn jè 'én-la kò mé-ni nga ma kòkón-najìn jè 'én ra tjí'ma a'ta 'tse Cristo nga 'sa ítòn, jè ra ta kíi kjoa-ni nga ndayá tìjna'ya. ⁴Títsa'batjì-nájìòn mé-ni nga 'se-na nga'ño nga nda kjon-ní kixi kichjàyajin-la xita koni 'sín nga tìjìnè-la nga kichjà.

⁵Nda kjon tìchjeén nìchjin ra tìsahijyo nga nda tjahíkoò kjobítsjen-no ya ajin-la xita ra kjè kì be 'én-la Nainá. ⁶'Kia nga jchikoo xita, jña tìchjeén 'én ra nda tsò kò ra nda sasén-la. 'Koaá 'sín koma-ni nga sakò-no 'én kó'sín nga 'kín-la tsa 'kia mé 'én ra skonangi-no.

Kó'sín jè Pablo síhixo'ta xita

⁷Nga'tsì mé kjoa ra tíma'tiaan, jé kòkitso-no jè 'ndsé Tíquico ra tì'koa tsjacha-jìn ra nda tíbasìko-na nga nda níxákjo-lajìn Na'ín-ná. ⁸Kíi xá tísikásén-no nga jè 'keènajmí-no ra a'ta tsajìn kó'sín títsajna-jìn, kò jé sùjetakòn-no nga 'se-la nga'ño inìma-no. ⁹Tì'koaá yaá tìbáhijta-kò-te jè Onésimo jè ra xita xàngioo ma, jngo 'ndsé ra xita kixi ra 'ño tsjacha-jìn. Jña 'keènajmí-no mé ta kjoa ra tíma ijndíi.

¹⁰Jè Aristarco ra taña títsajna'ya-jìn ndayá, tísíhixo'tá-no, kò tì'koa tísíhixo'tá-no jè Marcos ra ti xákjén ma Bernabé; nga ijyee asa ijchò jngo-no xajon a'ta 'tse Marcos; tsa 'kia nga kijchòjkon-no, nda chjíbétjò. ¹¹Tì'koaá tísíhixo'tá-no Jesús ra tì'koaá Justo 'mì-te. Ta jña-nì 'ndsé kii ra xita judío ra kó'sín nda inchisíxáko-na a'ta 'tse kjotéxoma-la Nainá, kò nda inchtsjá nga'ño-na. ¹²Jè chì'nda-la Cristo ra 'mì Epafras ra xita xàngioo ma, tísíhixo'tá-te-no. Kji'tá nìchjin nga 'ño bítsa'ba ra a'ta tsajìòn-jìòn 'kia nga chja'ta-la Nainá. 'Koaá 'sín síjé nga ngi kixi kítsajna ki'tà kò ngi nda kjon-ní katasijin-no mé kjòn-ni ra mejèn-la Nainá ra a'ta tsajìòn. ¹³'An ndaa tíbe kó'sín nga jè Epafras 'ño makájno-la ra a'ta tsajìòn kò makájnoó-te-la a'ta 'tse 'ndsé ra títsajna ya naxindá Laodicea kò ra títsajna ya naxindá Hierápolis. ¹⁴Tísíhixo'tá-no jè chjìnexki ra 'mì Lucas ra 'ño tsjacha-jìn; kò jè Demas.

¹⁵Ra a'ta tsa'an tìhixo'tá-ná jña 'ndsé ra títsajna ya naxindá Laodicea. Kò tìhixo'ta-te-ná jè Ninfa kò nga'tsi xita naxindá-la Cristo ra ya maxkóya ya ni'ya-la. ¹⁶'Kia nga ijyee ya chjítá'yá ya ajin-la xàngioo jè xajon rakii, tìkasén-la jña xita naxindá-la

Cristo ra títsajna ya Laodicea mé nì nga tì'koa katakotá'yá-ni; ko jè xajon ra 'tse naxindá Laodicea tì'koaá chjítá'yá-te ra jiòn. ¹⁷Ko'tìn-la jè Arquipo: nda katasíhitjasòn jè xá ra kitsjà-la Cristo.

¹⁸'Koaá 'sín tísixó'tà-no 'an ra 'mì-na Pablo. Ndsá sabá tíbindá-na ñánda nga fehe'ta-ni xajon rakìi. Tikítsjen nga ndayá tíjna'ya. Nainá katasíchikon'tin-no. Ko'sín katama.